



想愛飛

歇在都市个大樓，離地面兩十公尺高个地方，看往左片下係對面販仔屋罕得見人个屋頂坪，看轉右片析係隔巷大樓高天天、面逼逼个大壁扇，目珠前有自家屋下一面無聲个壁，幹過頭去還係，堵著壁。真想，生一對翼胛，做得像細鳥仔恁樣，飛高高、飛遠遠，飛到白雲高、飛去海胥遠，就算係，停到山頂个大樹頂，鼻等樹香、享受一陣清心个空氣，乜好。

「這對，送分你！」老弟送佢一對，翼胛？毋係，係一對青鸚仔，佢兜從細喊佢「嘩礫屎仔」个鳥仔。嘩礫屎仔芮芮隻仔，聰明、搵搵跳，比佢還較多話。頭過，看佢兜逐日歸大陣仔湊等，在(di)大樹間丟上丟下、在(coi')大樹肚唧唧啾啾開大會，佢就異想尋一對來做伴。毋過，共下跔在屋肚兩日仔，佢兜就無想愛摻佢講話也，佢做佢煞猛想愛打嘴鼓，佢兜毋係犁頭側面，就係兩儕講細話仔詐無愛聽。

後尾，摻鳥籠仔徙到花臺个花樹肚，換水、餵粟仔水果个時節，佢兜正有撒轉頭來，喁喁喁摻佢投。投麼个呢？佢知，恁久窗門外背異鬧熱，逐日都有你兜个朋友來掃食水果，逐日也啾啾滾在該研究「這門啊，算地愛仰仔開？」捨毋得啊，佢乜異無結煞。好得兩禮拜仔，正經分你兜尋著訣，恬恬仔打開門飛走咧。雖然逐日看你兜像細人仔樣仔冤家、相惜，異生趣，莫講還曉得摻佢相詢合應話。毋過，闊野野仔个天地，正係你兜原本應該遊寮个所在，空殼个鳥籠仔就放佢空忒好啦。

無鳥籠仔个窗門外背，逐日還有白頭鳥來相借問。該日仔，一隻細鳥子仔咚聲仔跌到花臺面，佢正知，白頭鳥恬恬仔來做寶，還孵出細鳥子仔咧。大鳥仔尋食轉，看著橫在缶仔面頂做嬌个細鳥子仔，先遽板飛轉寶摻食物放好，正定心飛過來摻細鳥子仔夾轉去，該調性就係講「尷尬呢！就講還愛等加兩日仔，等翼胛砸碰地正飛得遠啊！」

逐日，白頭鳥都像守顧老朋友樣仔，來到窗門框仔企正，啾仔兩聲仔正肯安心飛走；無定著，異有人情味个白頭鳥，乜識摻該對精善善仔个嘩礫屎仔在天空相閃過呢。飛啊，做你兜放勢牯飛唷，帶等佢想望自由个心意，咻到遠遠去。

作者：彭瑞珠

☆詞彙學習☆

- | | |
|---------------------------------------|--|
| 【嘩礫屎仔】bid lid sii` eˇ：形容很小的意思，本文指綠繡眼。 | 【喁喁喁喁】ngiauˇ ngiauˇ ngiau ngiau：叨唸、抱怨。 |
| 【搵搵跳】fag` fag` tiauv：形容人靜不下來的樣子。 | 【算地】son eˇ：到底。 |
| 【丟上丟下】diu song` diu ha´：形容極快速的往返。 | 【缶仔】fiˇ e`：陶瓷，此指磁磚。 |
| | 【咻】xiu：形容箭或炮竹發射的聲音。 |

☆文法學習☆

【還係……正……】hanˇ he…… zang……：相當於國語的句型「還是……才……」。

例1：高血壓，還係愛照時間食藥仔正做得。（高血壓，還是要按時服藥才行。）

例2：風搓天還係莫上山，正安全。（颱風天還是不要上山，才安全。）